



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

West Bengal nung CM, Mamata-i aniba TMC-i takok angu

Messi-i English football pu asemer



VOL. XVIII NO. 198 (ADOK 198) DIMAPUR

TENTONÜ (MONDAY)

MONUPII (MAY) 03, 2021

₹ 5.00

## COVID-19 Nagaland: Nisung 216 dak putet; 2 asü

**Kohima, May 2, 2021 (TYO):** Deobarnü Nagaland nung nisung 216 dak COVID-19 aliba putet aser parnok züngsema nisung ajak agi 14,350 kümogo.

"Tanü nisung 216 dak COVID-19 putet. Parnokji Dimapur nung 104, Kohima nung 95, Mon nung 11, Mokokchung nung 4 aser Longleng nung 2 lir. Külen, nisung 27 taneptsü angu. Parnokji Dimapur nung 23 aser Kohima o Mokokchung nung anana (2) lir" ta Health & Family Welfare Minister, S Pangnyu Phom-i metetdaksü.

Nisung 14,350 rongnungi 12,295 taneptsü nguogo aser tang 1,529 anepaludar, ta paisa ashi. "Nagaland nung COVID-19 nungi taneptsü angur 85.67% dang kümogo," ta State Nodal Officer for Integrated Disease Surveillance Programme, Dr Nyanthung Kikon-ia ashi.

Tang anepalurtem rongnung parnok 141 dak shirangba yimya lir, 21 tera shiranga oxygen agir, 19 kanga shiranga oxygen agir, ka kanga mejungi lir aser nisung 3 ventilator nung anepaludar. Tanüngba nisung 1,344 dakbo shirangba yimya kecha mali" ta paisa metetdaksü.

Dimapur aser Mokokchung nung nisung ana asüba züngsema tasür ajak agi nisung 109 kümogo. Ajisüaka, tasürtem rongnung parnok 10 bo tanga timtem ajanga asü. Nagaland nung COVID-19 puteter nisung 417 tashi tanga state temi ogo, ta Dr Kikon-isa ashi.

Nagaland nung COVID-19 alitsü akok ta temolung melemi bilemba sample 1,48,118 tendangogo. RT-PCR ajanga 79,393, TrueNat ajanga 38,326 aser Rapid Antigen Test ajanga 30,399 tendang, ta paisa shisem. "Honibar tashi nung Nagaland nung nisung 1,65,007 nem COVID-19 vaccine indang dose 2,07,027 agütsüogo," ta State Immunization Officer Dr Ritu Thurr-i ashi.

Vaccine agirtem rongnung frontline workers 50,320, healthcare workers 14,777 aser arishi küm 45 ser tempur 99,910 lir, ta pai metetdaksü.

"Parnok rongnungi nisung 42,020-i dose anaprong agiogo. Parnokji front-line workers 24,492, healthcare workers 9,772 aser arishi küm 45 ser tempur 7,756 lir" ta Dr Thurr-isa ashi.

## ECI-i takok anguba benjung mamongtsü tuyur

**New Delhi, May 2, 2021 (Agencies):** Linük nung COVID-19 kanga menatepba atema Deobarnü Election Commission (EC)-i state aser Union Territory nung Chief Secretary ajak aser political party tekolakpurtem dangi votes azüngdak takok anguba sentongtem ayonga magütsü atema tetuyuba agütsüogo.

"Tanü votes azüngba sülen nübortemi takok anguba sentongtem ayonga magidaksütsüla. Commission-iba ya süoki ia bilemer aser akokba tashi wara dak rangloker tenokdangbatem agütsütsüla" ta ECI-i metetdaksü.

Station House Officer (SHO) kari public benjungtepba menokdangra, parnok mapa nungi anentsütsüla aser ozüngi melaba ama merenshütsüla, ta ECI-isa Chief Secretary tem dang tuyuogo.

ECI-isa political party tekolakpurtem dangi shidi züluba nung tetuyuba agütsüba sülen

manidakba atema mepelaba shia lir. "Nenoki party lennirtem aser züngsemtem dang benjung mamongtsü atema tetuyuba agütsütsüla. Iba ama tensa ka nung ECI-i latetsüba aser ano NDMA/SDMA ajang COVID teinyaktsütem metetdaksüba sülen anidaktsüla" ta ECI-isa metetdaksüogo.

"Disaster Management Act, 2005 aser tanga ozüngtem kübok aibelenertem merenshütsü atema onoki Chief Secretary/Director General of Police nem tetuyuba agütsüogo" ta parnokisa political party tekolakpurtem dang ashi.

COVID-19 inyakyim benschia Assam, Kerala, Tamil Nadu, West Bengal aser Union Territory of Puducherry nung Assembly election agiba indang votes tanep nungi azüngtsü tenzük.

Assam aser West Bengal nung shilem aika lemsar election agi saka Kerala, Puducherry aser Tamil Nadu nungbo April 6, 2021 nü polling agia liasü.

## Assam COVID-19 tensa tamajungba akümer

**Guwahati, May 2, 2021 (Agencies):** Assam nung COVID-19 tensa tamajungba küma aoer. Deobarnü Assam nung nisung 2385 dak COVID-19 putet.

Assam nung sample 23818 tashi tendangba sülen nisung 2385 dak COVID-19 aliba putet aser parnok nisung 1099 tashi Guwahati aser temeket nung dang lir.

Assam nung COVID-19 nungi taneptsü angur 89.6% lir.

Assamsorkari Hokolbar aonung nungi May 7, 2021 tashi night curfew alitsü ozüng agütsüogo.

State nung COVID-19 kanga putetba ajanga sorkari aonung 8:00 ako nungi anepdang 5:00 ako tashi curfew alitsü telemtetba agi.

Assam nung dokantem aser shishilembadak ajak aonung 6:00 ako tashi nung shibangtsü, ta Chief Secretary Jishnu Baruah-i metetdaksüogo.

## Assembly Elections 2021: TMC, DMK, LDF, BJP-i takok angur

**New Delhi, May 2, 2021 (Agencies):** West Bengal nung Mamata Banerjee-i aniba Trinamool Congress (TMC)-i takok tulu angutsü aser kümsük tasembenbuba atema sorkar akümtsü.

Election Commission-i ashiba agi, West Bengal nung züngsem 294 agi akümba Assembly nung TMC-i menden 210 nung takok angutsü aser BJP-i menden 77 nung dang takok angutsü.

Ajisüaka, Nandigram constituency nung CM Mamata Banerjee-i BJP Suvendu

Adhikari tsüngdang tamakok angu.

Tamil Nadu nung MK Stalin-i Chief Minister inyaktsü aser ibaji DMK-i aniba teloktepi menden 145 nung takok anguba ajanga lir.

Kerala nunga Pinarayi Vijayan-i aniba LDF sorkari otsü tasen ka yangluteta sorkar akümtsü takok nguogo. Kerala nung küm 40 shi jungnüa nung tang mezüng atema kasa telok kati sorkar tanaben akümtsü takok ngutetogo.

Züngsem 140 agi akümba assembly nung CPM-i aniba

LDF teloktepi menden 97 nung takok angutsü asadangteta lir. Külen, Congress-i aniba UDF teloktepi menden 43 nung dang takok angutsü ama lir.

Tawa agiba assembly elections nung BJP-i takok angubaji Assam nung dang lir aser parnoki menden 126 nungi 77 nung takok angutsü ta asadangteta lir.

Külen, Puducherry nunga NDA-i sorkar akümtsü ama ajiteter, kechiyong züngsem 30 agi akümba assembly nung NR Congress-i menden 8 aser BJP-i menden 3 nung takok ngutetogo.

## Centre-i MBBS final year students teyari meshitsü akok

**New Delhi, May 2, 2021 (Agencies):** Centre sorkari COVID-19 dak sendakba apa inyaktsü atema MBBS final year students ajatsü akok.

India nung COVID-19wara tanabuba anema raraba mapang Centre-i healthcare workers peria maliba khuret koktetsü atema iba telemtetba agütsü akok.

Deobarnü Prime Minister Narendra Modi-i anir COVID-19 meyipa reprangshiba senden ka menogo aser iba mapang linük nung COVID-19 azioktsü atema tebilembatem lemsatep.

"Senden nung MBBS kaketshirtem aser medical o nursing courses nung pass-out kaketshirtem nem senotsü agüja yariteptsü atema ajungmesotsü jemi. Iba atema asüng osang tejangja metettsü" ta osang kar ajanga ashi.

"Sorkari telemtetbatem agiba rongnung National Eligibility cum Entrance Test (NEET) sota ayutsü aser MBBS pass-outs pur COVID mapa inyaktsü atema ajungmesotsü dena aitsü akok. Sorkairsa final year MBBS aser nursing students nem Covid

mapa inyadaksütsü akok" ta osang ajangasa metetdaksü.

"COVID-19 duty nung shilem agiba medical personnel nem sorkar mapa agütsüba den ano senotsü teyari agütsütsü" ta parnokisa ashi.

Centre-isa mapang tatsüka tsüngda oxygenated beds 10,000 yanglutsü imlar.

"Oxygen supply shitak agütsütsü atema sorkari nitrogen plants nungi oxygen plants melener. Nitrogen plants aliba industry tem jangjar aser itemji oxygen plants agi melener" ta tanü senden nung PM Modi-i ashi.

Linük kübok tesem kar nung COVID-19 ajanga healthcare personnel agi meperiba tia ajurua lir aser ama mapang ka nung tanü senden menogo.

Honibarnü Delhi nung aliba Batra Hospital nung medical oxygen peria maliba ajanga nisung 12 asüba rongnung doctor ka dena liasü.

Maneni, nija mozü ki ka nung resident doctor ka anibelem mekoki soset.

India nung COVID-19 wara

tanabuba ajanga mozü ki, morgues aser crematoriums süngogo aser kinungertem mozü aser oxygen bushiteper.

India ya alima nung COVID-19 vaccine yangluba linük tulutiba lir saka state kar nung vaccine manguba ajanga nisungtem nem magütsüteter.

India nung COVID-19 tanabuba agi matongdang PM Modi-i anir yimtenren telok balala nungi lennirtemi nisung o nisung tsüngda tepila melii aser mask meinoki lokti sentong tululu ayongzüka agia liasü.

Iba jagi mongin nisung karibo election rally tem aser tamangba yimsü dak sendakba sentongtem ayonga agiba atema tai tongloktsüogo.

PM Modi-i wara nung masü saka state elections nung ang temolung tali agütsüba atema nisungtem aitsür.

Taküm March ita tetenzüklen scientific advisers-i Centre sorkar dang linük nung COVID-19 indang variant tamajungba ka agi kongshitsü ta shia liasü saka sorkari iba atemaji kecha meinyak.

## Opposition lennir 13-i Centre dang vaccine angati agütsütsü ayongzüker

**New Delhi, May 2, 2021 (Agencies):** Deobarnü Opposition party 13 nungi lennirtemi Centre sorkar dang Covid-19 wara kanga prokshiba atema lokti nem angati vaccine agütsüba maparen tenzüktsü ayongzüker.

Parnokisa Centre dang hospitals aser health centres ajak nem tetsükdaksü kecha melii oxygen agütsütsü ayongzüker.

Iba shidi nung Congress president Sonia Gandhi, JDS lennir & taoba prime minister HD Deve Gowda, NCP lennir Sharad Pawar, Shiv Sena tanishir

Uddhav Thackeray aser TMC tanishir Mamata Banerjee nungertemi sign süa lir.

"Asen linük ajungalen wara maziokteti prokshiba mapang ka nung, onoki Centre sorkar dang linük nung tesem balala nung aliba hospitals aser health centres nem Oxygen peria agütsütsü ayongzüker" ta parnoki külem sangdong nung metetdaksü.

"Onokisa Centre sorkar dang tangsa linük nung free mass vaccination programme tenzüktsü ayongzüker" ta parnokisa ashi.

Iba mapa nung vaccination programme atema budget nung Rs 35,000 crore lemsüka aliba amshitsüla, ta Opposition lennirtemisa metetdaksüogo.

Iba shidi nungsa JMM lennir & Jharkhand Chief Minister Hemant Soren, DMK tanishir MK Stalin, BSP tanishir Mayawati, National Conference lennir Farooq Abdullah, Samajwadi Party tanishir Akhilesh Yadav, RJD lennir Tejashwi Yadav aser Left lennirtem D Raja (CPI) o Sitaram Yechury (CPI-M) nungertemia sign süa lir.

## Sericulture Director Wabang Lemtur den tepila sentong agi



**Dimapur, Monupii/May 02 (TYO):**

Sericulture Department nung Director menden nungi anisungzüksang, Wabang Lemtur nem akum agüja April 30, 2021 nü Directorate Conference Hall, Kohima nung sentong ka agia liasü.

Iba sentong nung Orenpomo Kikon, Commissioner & Secretary to the Govt. of Nagaland, Sericulture Department ajanga jembiba mapang, Wabang Lemtur-i department asoshi bendanga agütsür tenzüka atema tenünsang agütsü aser ano

tarutsü anogotem nunga Department-i nungdakba mapang teyari agütsütsü renema alitsü mepishia liasü.

Sericulture Department nung Director tasenba, T. Sanny Pongener-i Department tenüng nung jembiba mapang, Director menden nungi anisungzüksangi bendanga agütsür pa indang lenisüba kübok ki-o-jen aika yangluba aser skill development training tem agütsüba asoshi tenünsang agütsü.

Registrar, Thomas Rengma-i Director menden nungi anisungzüksang indang

service profile zünga metetdaksü, shiba arishi küm 60 ajungba sülen mapa nungi anisungzüker alitsü.

Wabang Lemtur-i tepila o jembiba mapang Tsüngremi pa nem takum tajung moatsüba asoshi tenünsang agütsü aser department nung aliba officer aser staff temi temolung agüja mapa inyakba nung pa den yaritepba atema pelaba lemsatepa liasül.

Iba sentong nung Mathung Kikon, Joint Director menden liasü aser Vikehielie Pienyu, Deputy Director ajanga tepela ankep o jembia liasü.

## Assam Rifles temi International Labour Day mungogo



**Dimapur, Monupii/May 02 (TYO):** HQ IGAR (North) tawabangka kübok Assam Rifles, Kiphire Battalion ajanga May 1, 2021 nü Kiphire district kübok Kiphire, Mimi, Longmatre aser Pungro nung International Labour Day munga liasü.

Labour temi mapa balala inyakba akum agüja sentong ka ayongzüka, mapa inyaker nem jang-o-tzü agütsü aser Pungro jila nung labour 11 nem chiyongtsü agüja liasü, ta sangdong ka ajanga ashi.

Yimtsüng pezü nung iba sentong agidang labourer parnok 133 dena liasü.

HQ IGAR (North) kübok Assam Rifles, Chieswema Battalion ajanga Phek district kübok Chieswema, Tseminyu, Jessami aser Cheiphebozu yimtsüngtem nung May 01, 2021 nü International Labour Day munga liasü.

Iba anogomung nungtem nung aayanger aser mapa inyaker nem jang-o-tzü agüja liasü.

Assam Rifles, Phek Battalion ajanga iba anogomung tenüng nung Phek district kübok Phek, Ziphu, Meluri, Avangkhu, New Thewati aser Akhen tesemtem nung COVID-19 tashidak nungi kumzüka alitsü osettem May 01, 2021 anogo lema agüja liasü.

Iba mapang parnoki yimdaklir aser aayanger nem mask, sanitizer, multivitamin aser jang-o-tzü lema agüja liasü. Tang COVID-19 tashidak wara agi alima tesem ajunga sünger pei poksungtsü asoshi item nisungtem yagi longren-longpang ajak nung mapa balala inyaka jajar.

Iba sentong kübok yimdaklir nisung 169 ajangzüka liasü. Sepaitemi mapa tajung inyakba atema yimdaklirtemi pelaba lemsatepa liasü.

International Labour Day nungtem nung HQ IGAR (North) kübok Assam Rifles, Jalukie Battalion ajanga Peren Town nung May 1, 2021 nü Wellness & COVID

Awareness Campaign ka agia liasü.

Iba sentong nung aayanger (labourer) nem hand sanitizer, mask aser nanglong agüja liasü aser parnok nem COVID-19 tashidak tabu tasenba indang rateta ashi aser iba tashidak nungi jenbua alitsü angazükdakja liasü. Iba sentong nung lenmang yangluba mapa inyaker nisung 47 tashi shilem agia liasü.

Assam Rifles temi iba ama mapa tajung inyakba atema nüburtemi pelaba lemsatepa liasü.

Assam Rifles, Medziphema Battalion ajanga International Labour Day anogomung nung Dimapur aser Kohima district kübok Nihokhu, Kukidolong Ghaspani aser Zubza yimtsüngtem nung aayanger nem akum agüja liasü.

Iba anogomung nungtem nung COVID-19 protocol indang aayanger nem sangoktsü aser süngo jemdakja liasü. Iba sülen parok nem mask aser sanitizer lema agüja liasü.

## Changlangshu Revival Camp nung adener dang metetdaksür

**Dimapur, Monupii/May 02 (TYO):** Mon jila nung COVID-19 tashidak putetba mechi, Deputy Commissioner, Mon, Thavaseelan K IAS ajanga sangdong ka nung, April 21 nungi April 25, 2021 tashi nung adener nisung ajak dang

pei sasa 9862078993/8787645487 nung osang agütsütsü metetdaksüogo.

Maneni iba sentong nung adener tem dang kidang COVID-19 mera balala agia pei sasa dangar nungi pila (self isolate) alitsü mepishia metetdaksü.

## Longleng DTF on COVID-19 pur ajungben senden ayonger

**Dimapur, Monupii/May 02 (TYO):** Longleng District Task Force on COVID-19 pur ajungben rongdak senden ka May 03, 2021 anüngdak 12:30 ako nungi tenzüka Deputy Commissioner, Longleng indang Conference lobby room nung

amentsü, ta District Administration, Longleng indang sangdong ka ajanga metetdaksü.

Iba senden nung züngsem ajak medema arua adentsü mepishia metetdaksür, ta sangdong ajangasa ashi.

## SLNA, LRD nungi takotet nisungtemi Ukhrul semdang



**Dimapur, Monupii/May 02 (TYO):** NABARD nungi senotsü teyari agia yimtsüng pezü nung Springshed based watershed development project ana atema Detailed Project Report (DPR) yangluba nung yariteptsü atema Ukhrul, Manipur nung amenoka aliba NGO, Volunteers for Village Development (VVD) ajanga Land Resources Department, Govt. of Nagaland kübok register süa aliba society, State Level Nodal Agency (SLNA) dang asüngdanga liasü.

ayongzüka agi, kong yimtsüng pezü nungi nisung jenti arua dena liasü.

Iba project mapang tembangba sülena yimdaklirtemi anepalua inyakba nung ajemdaker project ya mesamai alitsü asünung nüburtem nem tajungtiba nung angatetdaksü. Maneni parnoki NGO nung inyaker tem nem springshed (tzüpokdak tzübo mesema ayuba) yimyattem angazükdaksü.

Parnoki survey agiba nung ajemdaker iba project tenzüksü aliba yimtsüngtem nung Disang formation (long tabu balala) aliba bushiteta liasü.

Parnokisa yimdaklirtem dang ali tazüng alidak süngjang-lijang atangba süngdong atemtsü ayongzü, aser lisa asadanger Alder (*Alnusnepalensis*) süngdong atem tajungba asütsü, ta shia liasü.

Item yimtsüngtem nung rongsenketsüng ajungkettsü asoshi ak, ango aser an metsüba den chibo-aonbo yanglutsü temsüa lir, ta parnoki asadangteta liasü.

Survey agiba nung ajemdaker parnok NABARD nem agütsütsü atema NGO asoshi Detailed Project Reports ana yanglutsü. SLNA yagi Nagaland nung aliba NGO tem den yaritepa maparen balala inyaka arur.

Parnoki Springshed management & development atema yimdaklir nem angatetdaksüba sentong

Sonowal, Himanta, Akhil Gogoi & Ranjeet Dass nungertemi takok nguogo



(Abelen nungi) Sarbananda Sonowal, Himanta Biswa Sarma, Akhil Gogoi aser Ranjeet Kumar Dass.

Guwahati, May 2, 2021

(Agencies): Assam Assembly election 2021 nung Rajjor Dal president aser tepuokdak aliba activist Akhil Gogoi, chief minister Sarbananda Sonowal aser minister Himanta Biswa Sarma nungertemi takok nguogo.

Assam Assembly election nungsa takok tulu angurtem rongnung State BJP president Ranjeet Kumar Dass dena lir.

RTI activist aser aluyimer lennir Akhil Gogoi ya tang Guwahati nung tepuokdak ka nung lir aser pai BJP candidate Surabhi Rajkowari madak takok angu.

Assam chief minister Sarbananda Sonowal-ia Majuli constituency nung Congress candidate Rajib Lochan Pegu madak takok tulu nguogo.

Maneni, Finance & health minister Himanta Biswa Sarma-

ia Jalukbari constituency nung takok nguogo.

Patacharkuchi constituency nung Assam BJP president Ranjeet Kumar Dass-i Congress candidate Santanu Sarma madak takok angu.

Külen, Asom Gana Parishad (AGP) president aser agriculture minister Atul Bora-ia Bokakhat nungi maneni takok nguogo.

Iba osang zülu tashi nung AIUDF candidate Abdul Aziz-i

Badarpur, Congress candidate Bharat Chandra Narah-i Naoboicha, BPF candidate Rabiram Narzary-i Kokrajhar West, BJP candidate Dharmeswar Konwar-i Sonari,

Congress candidate Sherman Ali Ahmed-i Baghbor aser Congress candidate Rekibuddin Ahmed-i Chaygaon nung takok anguba osang angazükogo.

Bharatiya Janata Party (BJP) lennir aser Rajya Sabha

MP Biswajit Daimary-i Panery constituency nung takok angu.

Assam minister Himanta den tesentaktep tajung aliba BJP candidate Taranga Gogoi-ia Naharkatiya constituency nungi takok nguogo.

BJP candidate Numal Momin-i Bokajan constituency nungi aser BJP candidate Rupsing Teron-ia Baithalangso constituency nungi takoktem angu.

BJP candidate tem- Manab Deka-i Lakhimpur, Bimal Bora-i Tingkhong nungi takok angu aser Hemanga Thakuria-i Palasbari constituency nung takoktem angu.

Külen, Congress-i Titabor aser Mariani nung maneni takok ngutetogo. Congress minister Ajanta Neog-i Golaghat nung aser MLA Rupjyoti Kurmi-i Mariani nung takok angu.

Cachar district nung ktdangsür 14 dak COVID-19 putet

Silchar, May 2, 2021

(Agencies): Assam kübok Cachar district nung votes azüngtsü metenzükdang ktdangsür 14 dak COVID-19 aliba puteta liasü.

Votes mazügdang rapid antigen test (RAT) agi aser

idangji ktdangsürtem dak COVID-19 putet.

Hokolbarnü parnok nisung 7 dak COVID-19 aliba putet aser ano yashi parnok 7 dak puteta liasü.

Assam state election commission-i counting staff ajak dak RAT agitsü

tetuyuba agüja liasü aser district administration tem dang COVID-19 negative report melii identity cards magütsütsü ashi.

Deobarnep nungi Assam nung ktdangsür 1,100 temai votes azüngba nung shilem agidar.



Assam Assembly election indang votes azüngba nung mapa lemsüka alir Assam Police ktdangsür ka Guwahati nung temang mejungi kümer ali nung laoba sülen anepaludang agiba noksa angur. Iba ya Honibarnü votes azüngdak Maniram Dewan Trade Centre jakdang atalok aser Assistant sub-inspector (ASI) Babul Kalita ji ambulance ka nung Excel Care Hospital-i anir ao anepaludar.

Tripura ADC yimtsüng 587 nung VDC tenzüktsüogo

Agartala, May 2, 2021

(Agencies): Tripura Tribal Areas Autonomous District Council (TTAADC) indang Executive Committee-i ADC yimtsüng 587 nung Village Development Committee tenzüktsütsü telemtetba agiogo.

Council tenteta aliba tesemtem nung terenlok maparen balala inyakba mittsü, achaayangtsü aser asadangtsü nukjidong yur TTAADC Executive Committee ajanga item Village Development Committee tenzüktsür.

TTAADC indang Additional Chief Executive Officer-i sangdong ka ajanga, "Tripura Tribal Areas Autonomous District (Establishment of Village Committee) Act, 1994 indang section 27, 29 & 41 nung agüja aliba tashi amshia, ADC yimtsüngtem nung terenlok maparen balala mittsü, achaayangtsü aser asadangshitsü atema TTAADC indang Executive Committee-i

ADC Village Committee 587 shia nung Village Development Committee tenzüktsütsü telemtetba agiogo. ADC yimtsüng shia atema ward nung züngsem aliba ama Executive Committee ajanga iba amala committee atema tenüng agütsütsüla" ta metetdaksü.

"Item Development Committee yagi ita trok dak tema atema achaayangtsü memelar," ta Additional Chief Executive Officer-isa ashi.

"28/04/2021 anogo 15 buba Executive Committee indang mezüng senden nung bangjemtepba dak sendakba nung iba sangdong agütsür," ta paisa ashi.

TIPRA Motha party otongdar sangdong ka ajanga ashiba agi, TTAADC nung CPIM-i aniba Left Front yimsüsüba mapang, parnoki terenlok maparen kecha meinyak ama temulung melemi bilemer asünung, iba executive committee züngsem tasen ajanga item mera tasen agir.



Honibarnü Shillong nung Meghalaya nung Director of health services (MI), Dr Aman Warr-i state medical experts den COVID-19 atema senden amendang agiba noksa angur. Iba sentong nung Dr Warr-i COVID-19 vaccine indang jembi aser ktdangsürtem dang wara mapang politics meinyaktsü aser ajaki amalitepa yariteptsü ayongzuka liasü.

ZPM candidate Lalduhoma-i Serchhip Assembly Constituency nung takok angu

Aizawl, May 2, 2021

(Agencies): Serchhip Assembly Constituency indang by-election nung Zoram People's Movement (ZPM) candidate Lalduhoma-i takok nguogo.

Iba by-election nung Serchhip Assembly constituency nungi Lalduhoma-i vote 3000 agi Mizo National Front (MNF) candidate Vanlalzawma madak takok angu.

MNF candidate Vanlalzawma-i vote 5314 dang angu. Tena sülen Congress candidate PC Laltlansanga-i tasembuba jenjang angu. Congress candidate PC Laltlansanga-i vote 2669 dang ngutet.

Mizoram kübok Serchhip Assembly by-election nung voter 83% dak temai vote enoktsüogo.

Independent MLA ka ama mesayutetba atema Lalduhoma menden nungi agienba sülen Serchhip Assembly Constituency nung by-election

agitsüsa aküm.

Arishi küm 71 tain Lalduhoma-i Zoram People's Movement (ZPM) telok tenüng nungi tokteptsü sangdongba sülen pa MLA menden nungi agienadok.

2018 election nung Serchhip constituency nungi pa ya Independent candidate ka ama takok ngua liasü.

"Independent MLA ka ama pa shima liasü saka pai Zoram People's Movement (ZPM) telok tenüng nungi tokteptsü sangdongba ajanga iba menden nungi pa agienadok" ta Lalduhoma anentsüba mapang Mizoram Assembly Speaker Lalrinliana Sailo-i metetdakja liasü.

IPS ktdangsür nungi yimtenren wadang nung ajemoka inyakbang Lalduhoma-i tesüiba küm 32 nung MP ama inyakba mapang pai kasa tensa ya ajangshiogo.

Linük nung MP aser MLA ama menden nungi agiener politician rongnung pa dang alitsü.



## TIR YIMYIM YIMOBILEM (EDITORIAL)

DIMAPUR TENTONÜ, MONUPII (MAY) 03, 2021

### Laishiba bushitsü mapang tajung

**T**ang ama Covid-19 tashidak wara agi loktia mesentepetter aser tangaleni aotsüa mesadem ta asüba mapang ya asenok tamangertem asoshibo Laishiba azüngtsü aser bushitsü mapang tajung ka lir. Aji oda, tanü putu yagi tashidak wara tamajung bener arutsüba dang masü saka tajung aser temoatsüa aika bentsür arua lir. Item tajungtem rongnungji computer aser internet ngutetba aser yanglutetba mapatem ya asütsü. Iba jagi asenok joko tsüngdong majurutepyonga computer aser mobile phone nung internet ajanga online nung mapa ajak tongtepratepa inyaktetter aser ajak dang temoatsü tulutibaji tangbo tenla kidangi maoyonga kidang mena yur Tsüngrem o rateta ashirtemi Tsüngrem o jembiba aser sayutsüngiba tenük agi ngua angaba ya asütsü. Ibayongji, tangbo sannüker kati sentep ka nung Tsüngrem o jembibaji, akhidangbo tenla kidangi arur nisung noklang ishikati dang angaya aliba to tangbo nisung meyrirjang aikati angar. Iba jagi kodang jungjunga bilemdangdir, Tsüngrem o agi nisungtem mesütsü asoshibo tang yasa mapang tajungtiba kumogo. Iba maangka arubaji reprangteta, taoba hopta nung iba osang kaket nung, "Covid-19 tashidak wara agi senzusenpong aser lokti senden sentepsü mesademi akümba mapang ya arogo ajak nung aonung shia online Bible Study (Lai bushiba mapang) sentong ka tenzük nunga koma süla?" ta asüba onük nung bilemdangogo. Aji oda, iba tasüngdangba langzürtemia tamangertem rongnung Lai bushitsüba kanga nungdak ta asüba tangatetba lemsatepogo. Atangji, asenok aikati anogo shia Laishiba azünger aser aikati Lashiba Lipok nungi Jungkai adok tashi züngmaa züngogo. Ajisüaka, Lashiba azüngba aser bushibaji azüngba kisüngji masü saka angatetter asü mangatetter ta asübajiang tongtibang lir. Laishiba yabo tanga otsü kaket ama masü saka Tsüngrem o, anungji Tsüngrem nungi anguba shisatsü aser temetetba melira mangatettsü. Kasaji, akhidang tenyartem mapang nung Yirusalem nungi Gazai aluba lenmang nung Ethiopia nunger tulur ka kor talungtsü nung Isaia kaket azünger saka mangatetter ta luya aliba mapang tenyar Filipi angatetdaksüba otsü ka Tenyartem Mapa 8 nung shia aliba angur. Iba Ethiopia nungba jagia Filip dang, "kari kü dang mesayura ne kechi kodaser angatettsü?" ta ashiba angur. Tanüa kasa tasüngdangbaji asenok tamangertem aikati asüngdangdagi saka Laishiba nung shia aliba Tsüngrem o rateta ashir agi anünger. Asenok ajak tamangersa süaka, mapang tajung nunga asenok aikati benjongbentsü nung khenkhen aoba dak alaka sentepi maor aser aoyonga aiben tajungshi aser tayongzükba o angar dang ashi, shitakba Lai o teratet ashiba sentepbo aiben metenji. Tanü asenok tamangertem süaka tamanger memesük alibaji asenoki Tsüngrem o mangatetba agi lir. Tang ya iba nungdakji reprangteta Tsüngrem tenzük aser Laishirtemi peisasa Lai bushia teratet agütsüba "Bible Study" sentong tajung ka yanglur, aonung shia mapang tatsütsü agiteta online nung nisungtemi pei mobile aser computer screen aser tv nung reprangtsüsa agütsütet nungbo nübortem asoshi koda tajangzük süla ta bilemer. Lai bushiba ya Lai azüngba kisüng masü saka angatettsü merangba mapa ka lir. Aji oda, tanübo asenokbo amangdaksütsü merangtsüba masü saka Laishiba nung zülua aliba Tsüngrem o ya angatetdaksütsü merangtsübjiang nungdaker. Asenoki amanger saka mangatetter ta asüba agi asenok sobaliba maparen ajak nung tamangerbo tamanger saka mamangba purtem ama kumadoker. Atangji, sayutsüngibo temela saka Lai o rateta ashitsübo tasak, kechiyong Tsüngrem o rateta ashitsüba kaketsa kaket azüngtsüla, tangari sayubatema angadangtsüla aser 1 Korint 2 nung shia aliba amato Tsüngrem miim o angatettsü asoshi kanga sarasademtsü nungdaker. Alima aser nisung taküm indang kodang bilemdangdir, ibai kanga shisabolutsü mapang saka kodang Tsüngremer mapang indang bilemdanga Pa nukjidong angatettsü merangdir, jangratemtsüka, kechiyong kidang nungi tanüla anir arutsü aser Lai o angatetdaksütsü aser angateta bushitsüba mapang tajungji tang mapangba ya lir.

## OLEMSABANG

### Tenzükba Nung Arok Shilem

~ Wati Longchar (Sempore)

#### Tenzükbaji kechi

Ao nung "tenzük" ta asüba ya tangatetba balala nung amshir. Nüchiso bushir dang "linük tenzük" ta ajar; Government office balala nung inyaker ta "government lar (servant)" ta aja; Bangdak yimsüsür dang "public servant"; NGOs balala nung inyaker dang "social worker", temang anema aliba mapa balala nung inyaker dang "health worker". Yamaji nübür tenzükba maparen balala aika ashitsü lir. Mapa balala ajanga nübür leman balala ajanga tenzüksü shimtetbaji maangka tulu, temoatsü ta bilemstsüla. Ibai nübürtem madak tashi amshitsü asoshi shimba masü, saka khuret ka amai agizüksüla.

#### Arogo aser Tenzükba

Arogo nung tenzük dang "Tsüngrem lar" ta ajar. Arogo ya alima lokti tentet ka amai masü, aser tenzükba maparen yaa alima lokti tentet denji medemdangtsü makok. Arogo yabo Khrista zü agi alangzükba purtemi akümba telok ka lir. Khristai sayuba ama alima dang Kangki apur iba temenen lima nung ochi indang kulisür asütsü Tsüngremi jatet. Khrista zü alangzükba telok rongnung tetsür-tebur, tanur-tain, takar-senkar ta tebandang mali, Khrista nung ajak kasa dang. Ano asenoki metettsüba kaji arogo ya building tajung ka sütetba alibaji masü, mesüra tambur ishikati nüsüng ajunga asoshi telemtetba agiba telok ka masü. Iba tamanger telok ya sobaliba telok tentet ka masü asü nungji, sobaliba ozüng amshia azüoka ayutsüba telok ka masü. Khonang-naroküm bushia, tashi toktepa, sentsü sayutepa inyakba telok ka masü. Saka Lai tesayuba kimong sūdaksür, ochi, tila akümba aser temeim nung maparen ajak inyaksüba jatetba telok ka ta angatetdi. Arogo nung "tenzükba" ta asübaji iba kimongji lir ta angatetdi.

#### Tekümtet tenyaba mapa asoshi arogo jatet

Arogoji kechia tema jatet ta süra samaa alibapurtem tekümtet dangi anitsü, shisabuluaa, temulung zürepa aliba pur nem teimla agütsütsü, jendoka aliba pur dang nüchi kuli sangoktsütsü, shira-shiko, asü-ama mapang rongjenseta aliba anisüngzük o, aser tanela nung azüla oa alirtem dang Tsüngrem O tim sayua indaksütsü arogo nem khuret agütsü. Iba tajaba nung, ibaibo teburi dang inyaksüla, yabo tetsüri dang inyaksüla ta tebandang mali. Tanü tetsüri Pastor mapa meinyaktettsü ta jembiba ya meimchir purapuji, tasü-mait, tiyazü o; Ibalaji Lai tesayuba masü ta angatetdi. Amangbapur ajak nem kasa khuret agüja lir. Tsüngremi nungloktsüba tenzükba mapa nung tetsür-tebur ta bendanga amshiba, aser teburi dang tekolak mapa ajak agiadokbaji tai. Tenzükbaji Tsüngrem nungi tenzük, aser tematiba Tsüngrem tajaba anungji meimchir shinga shinga Tsüngrem ochi kulisüba nungi nokdangtsü makok.

Baptist arogoi "amangbapur ajak putir ka ka" ta agizük. Amangpur ajak - na aser ni - kongsa lidir, kechi inyakdir yangji Tsüngremi ajatetba tenzük ama taküm alitsü takhangba ka ta angatettsüla. Tetezü putiri dang masü, amangba pur ajaki Tsüngrem indang ochi kulisüba nung shilem agitsüla. Tsüngremi nungloktsüba tenzükba mapa nung, shiba dak sempet lir, shibai ochi nung tasü ita kuli süteter, shibai ni Khristaji kü kumtetdakba ta nangzükter aser taküm bendanga agütsütsü mulungteter, parnokji Pastor, deacon, missionary, mission board aser committee balala, Mungdang nung tenzükba mapa balala nung tenzükdaksütsüla. Kin-kidong, anük-apang, tzükong, yim, sector balala, tebur-tetsür ta masü, Khrista teyongtsü sūdaksür shibai liteter, pa/laji tenzükba mapa nung shimtsüla. Temsüa dang lira ABAM nung Ex. Secretary, department balala nung secretary tetsür-tebur ta tebandang mali shimtsüla. Item mapatemji teburtem atema balaka wazüka ayuba masü. Taoba putu mangateti aibelena inyaka arubatem Tsüngrem dang tatok meshir, Ao arogotem tenzükba mapa nung asentenshi mapang tongogo. Sobaliba tsütsü dangi masü, Lai tesayuba dangi meyiptsü mapang tongogo.

#### Yimtsüng yimsüsüba aser Deacon yimsüsüba menden balala

Tekolak bushiba putu, Aor yimtem putusa putu tebur yimsüsüba nung dang lia aruba ajanga, Ao arogotem nung deacon menden ya yimtsüng putu menden mesüra samen menchen amai dang bener aru. Yimtsüng yimsüsüba menden ama dang arogo nunga tambur ishikati dang telemtetba agia aru. Yimtsüng kar nungbo kidong apia deacon shimba ajangshia aruogo. Ano arogo kar nungbo Pastor ola maka, tetsür aser lanur toklang tenzükbo meeting nunga mejaoker ta lir aru. Aika melenshia odagi, saka tanüa yimtsüng kar nungbo (ashiko jila arogo nunga alitsü shibai metet) ano akhi putu ama dang tanüa bener odi asür. Yimtsüng arogo kwika nung tetsür pastor lir? Deacon kwika lir? Aortem bilemdangdir! Lai tesayuba ochi o sobaliba ozüng aser tentet dang temaba sūdaksüdi. Laishibai tuyuba ama arogo nung temelenshitsü aika dang nungdaka lir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Amy Grant densema Khristan artist temi Faithful Project tenzük



May 1, 2021 aonung Faithful project Livestream nung shilem agir kentenertem aser kaketzülurtem külemi tangokba noksa nung angur.

**May 02, 2021:** Laishiba otsü nung aliba tetsürtem nungtem nung osangtajung kentener Amy Grant densema tetsür kentenertem aser kaketzülurtem longjemer Faithful Project tenzük; iba project nung otsütem aser kentem densema lir.

2019 küm November ita mezüing tetsürtem longjema iba project atema maparen tenzükü liasü. Ken zülutsü aser atentsü atema nungtugu kentenertem aser kaketzülurtem adenshia liasü.

Faithful Project telok ka nung Amy Grant densema lir, aser parnoki Laishiba nung tetsürtem shilemji kanga tongtibang, ta züngshir.

Osangbener den jembidang Amy Grant-i, "Otsü shia jagi ajak abensaa sayur. Minority süaka, temeden malirtem süaka, ola madokba telok ka süaka asenok ajaki ola adoka jembitsü nungdak," ta ashi.

Laisa, "Onok aiben adenshia jembiba mapang nung tetsürtemi ola adoktsü atema

bangjema liasü. Nisung kar dak ajemdaker onoki tetsürtem majungketner, ajisüaka 'onok ka dang' ta asüba osang onoki sangdongner," ta metetdaksü.

Iba project kaket nungji kaket zülurtem- Ann Voskamp, Lisa Harper, Kelly Minter, Ruth Chou Simons, Ginny Owens, Sarah Macintosh, Amanda Bible Williams, Sally Lloyd-Jones, Kelly Needham, Raechel Myers, Savannah Locke aser Trillia Newbell nungeri shilem agia lir. Amy Grant-i kaket okila zülü aser Mary Magdalene indang ken "A Woman" zülü liasü.

Iba kenji Amy Grant aser Ellie Holcomb nati aten.

Iba project kensep nung shilem agia alir kentenertem rongnung Sandra McCracken, Leslie Jordan, Christy Nockels, Rachael Lampa, Kelly Minter, Sarah Kroger, Christa Wells, Tamar Chipp, Jess Ray, Janice Gaines aser Taylor Leonhardt nunger lir, iba dak alia kaketzülurtema kari kensep nungji shilem agia lir.

Amy Grant-isa, "Kanga mejangjaba tetsürtem indang taküm otsü-a kar shimteta lir aser item otsüji konang nüngsang indang masü. Otsü karbo tejashi otsütem lir saka otsü shia jagi sobaliba putiotsü nung tetsürtemi tongtibang shilem agiba indang shia lir, aser item otsü bilemtetsüji kanga tongtibang," ta ashi.

"Iba project ajanga onoki mapang agia item tetsürtem indang taküm otsü kanga junga shisadanger. Laishiba nung aliba otsütemji ajanga tang-a asenok dang kechi shiner?. Hallelujah dang nungi-a tajungba," ta laisa shisem.

David C. Cook-i publish asüba Faithful kaket nung Laishiba tekongtem ajanga tazüngertem nem Tsüngremi tetsürtem züngshiba indang angatetdaksüba nung yarir. Iba dak alia Faithful kensep nung aliba kentem ajanga tetsür Khristanem indang otsü ashir.

Faithful Project-i May 1 aonung 7:00 ako nung livestream sentong ka agia liasü.

## Karnataka nung Khristan temi Covid anema raraba nung yaritsü

**May 02, 2021:** Tang India nung Khristan lenirtemi linük nung coronavirus wara süngjemba nung Arogotemi shilem agitsü atema lenmang bushidar, ta Amongnü Union of Catholic Asian News (UCAN) osang ajanga metetdaksü.

UCAN osangbener den jembidang Bangalore nung tongti putir, Peter Machado-i, "Hospital tem nung nisung süngadokogo aser tang teshirangdakpurtemi hospital toktsü moura shiranger tasanpurtem hospital nung memongtetsü," ta metetdaksü.

Peter-isa, "Kanga mejungi shirangertem dang, hospital nung amongtsü atema yipten mali ta ashitsüji tasak. Parnoki tangsa medical teyari nungdaker, talisa oxygen agitsüpurtemi hospital nung

amongtsü nungdaker," ta metetdaksü.

Taküm April ita tomnen nungi tenzükü India nung anogo shia nisung 300,000 tema dak coronavirus puteta arudar, ajisüaka ano iba tashidak keta alir aika metendangi alitsü.

UCAN-i ashiba agi, Peter Machado-i par Arogo kübok aliba Catholic hospital ajak dang Catholic school tem aser tanga Catholic institutions nung COVID-19 care centers amenoka coronavirus agi shirangertem yaritsü tuyuogo.

Item Centres nungi coronavirus tashidak agi kanga mejungi shirangertem yaritsü.

"Asenoki yamaji inyakra kanga mejungi shiranger aika hospital nung mongtetsü. Tera dang shirangertembo maneni temporary centers nung teyari

agitsü akok," ta ashi.

"Ni (Karnataka) state sorkar den onok tebilemba lemsatepogo, ajisüaka tang tashi nungbo sorkari telangzüba magütsü," ta paisa metetdaksü.

India nung anogo ka kija nung nisung lakh 4 tema dak coronavirus putetba sülen anogo ka lir Karnataka state nunga coronavirus agi tang teshirangdakpur kanga timba kümogo, kechiyong May 2 nü Karnataka nung nisung 40,990 dak iba tashidak putet.

Tang India nung coronavirus agi tamajungba kongshiba state ji Maharashtra lir aser tanabuba state ji Karnataka lir.

Tang Bengaluru kija nunga coronavirus tashidak agi teshirangdakpur lakh 2.7 lir.

## ANO GO ABEN TSÜNGREM DEN

### Tsüngremer o nung atentenba

*Saka shiba ajemalu aser tanela teraksa ali aser shibai Kü O nung atentena ali, Pa dang ni reprangtsü. Isaia 66:2.*

Kodang Tsüngremi jembir nai atentener asü? Takoksang Tsüngremi ne jembiba aser ne shi temang kongshiba tatesa jembibaji kodang liasü? Kodang Tsüngremi Yohan den jembipa tashi ajak lulaa aküm (J.A. 1:17). Kodang Pauli Damaska among nung Yisu ajuru aser Yisui pa den jembipa ali nung lao (T.M. 9:4); aser kodang Peteri Yisui shiba angateta aru pai Yisu tsüngdang apudak aser ashi, "Ni nungi pilaang, kechiaser ni temenen nisung ka lir, O Kibuba!" (Luke 5:8).

Teyanglusangi tanga ne den jembir ta bilema marur asü? Temeshiba yimlaa nai Laishibaji azünger asü, taküm melenshidaksüba O Tsüngremi tanü ne den jembiba angar asü. Laishibai ashir, "Kibuba tsübubaji shisatsü tetenzük lir" (A.Shin 9:10). Idakji nai tetsübu agi angatsüba aser ajak nung Tsüngrem akhüm tsübutsüba mapatem lir.

Nai Lai azüngdang, nai azüngba tekong kar ajanga Tsüngremi ne den indang indanga jembir ta nai angatetsü. Tsüngrem shibai jembipa aser alima ajunga yanglu iba tesüngmangtsü shisadandang, Pai tang ne den jembir ta shisadandang. Yisui jembipa aser tasür shia arudaktsü, yipru süngjemdaksü, temenen tanelatem aridok aser tashi anebtsü süra Pa nungi aruba O jagi ne taküm nung kechi inyaker? Ne dak ataloktsü takoktsüji atentenba? Tanaben nai Laishiba, temeshiba teyimla nung aji lapoka zügang.

## India nung Church of Scotland partner Arogoi sarasademjang ta mepishi

**May 02, 2021:** India nung Church of Scotland partner Arogotemi tang India nung coronavirus tensa atema sarasademang ta mepishia metetdaksü.

India nung nüburtem yaritsü atema Church of Scotland-i Church of South India nem emergency grant Pound sen 5,000 (India sen lakh 5) agütsüogo.

Kolkata nung alir aser Church of North India nung inyaker, Rev Moumita Biswas-i Church of Scotland dang, India linük ya tasüba lenden ka kümogo, ta metetdakja liasü.

Laisa, "Tesüiba hopta asem tashi onok tensa tamajung ka nung lia arudar. Iba wara agi mekongshidangbo onoki osangtem dang angashia liasü, ajisüaka tangbo onok kibong züngsemtem, kinüngertem aser Arogo lenirtema iba tashidak agi südar. Ozü kinüngerana ana den külem tenzükera aika iba tashidak agi süogo. India nung iba wara agi ajak kongshir," ta metetdakja liasü.

"Onoki chiyungtsü nungdaker, ibayongji Arogotemi teyari agütsüdar. Iba dak alia onoki sarasadem-a nungdaker. Onok timtem lemsatepba ajanga onok kija masü, saka adianutem aika onok den dena lir ta bilema melung süngzüker," ta lai ashi.

"Ajak dang tulutibaji-kati ka atema sarasademtsütsü nungdak. Sarasadem den külemi mapa adentsüba aser India aser Brazil nung tatalokbatem

sangdongtsüla. Yangi atalokba osang sangdongba ajanga linük aikati tansütsü," ta lai ashi.

Amritsar nung tongti putir, Rev Dr P. K. Samantaroy-ia Church of Scotland dang, "emails ajanga onok den tejashi lemsatepba atema kanga pelar. India nung, talisa yimti tulutem nung medical facilities nung nisung masemer aser virus variants tali puteter. Sorkari nüburtem dang vaccine agitsü ajungshir, ajisüaka tanabuba dose agütsütsü atema health centres aika nung vaccine mali," ta metetdaksü.

"Tang ama linük rangben timtemba mapang nung onoki nenok sarasadem nungdaker. Tsüngremi ajak azüoker aser Tsüngremi mapa inyaker nung ang iba wara süngjemtsü," ta paisa mepishia metetdaksü.

India nung Arogotemi nüburtem nem chiyungtsü, masks, hygiene aser oxygen supplies agütsüba den külemi kanga mejungi shirangertem nem medical treatment atema teyari agütsüdar.

Church of Scotland's Faith Impact Forum Convenor, Rev Dr Susan Brown-i sangdong ka ajanga, "India nung iba tashidak putetba aser iba tashidak agi asübaji taokatsüka lir. Talisa sensakertem taliba timtemer. Onoki Churches of North aser South India atema tebilemstü akar aser nüburtem dang Disasters Emergency Committee nem tenla agüjjang ta mepishidar," ta metetdaksü.

**OLONG PAITEP # 5800**

1			2			3		4		
					5					
		6								
							7			
		8								
9										10
				11		12				
13										
14						15				

**TIPLÉN**

- 1. Chiyongtsü oksa
- 3. Tatalokbatem
- 5. Tama
- 6. Pei meyong aküm
- 7. \_ \_ \_ \_ bang
- 8. Kinungpurtem
- 9. Nokdak masü
- 12. \_ \_ \_ la
- 13. Ochi masü
- 14. Yagi Sü ataker
- 15. Temadok

**LANGTSÜNGLEN**

- 1. An tetsü
- 2. Juzüa senzüba shiruru
- 3. Tamendakdak
- 4. Tiak-asang
- 7. Tasa
- 8. Süngjang telung nung aliba
- 10. Ibai masü
- 11. Ano mamen

**OLONG PAITEP # 5799 TELANGZÜBA**

**TIPLÉN :**

- 1. Semtu, 3. Lepko, 5. Bilem, 8. Ulu,
- 10. Tsünpang, 11. Tesangwa,
- 13. Aoksa, 15. Putir, 16. Yipru.

**LANGTSÜNGLEN :**

- 1. Sayu, 2. Teb, 4. Kimong, 6. Lungkak,
- 7. Milak, 9. Zünga, 10. Temopu,
- 12. Walu, 14. Ali.



**ALOKBA AROGO TENZÜKBA NUNG KANGA MAZÜNGER :**

- Kiyonger** : Oko Alok, na azüngra asüngbo ozülui odikoto.
- Alokba** : Ayaya, ni khenyongi mazüngja.
- Kiyonger** : Waa, koda kechi mapa ali?
- Alokba** : Asüng nungi onok Arogo audit amongtsü asüra.
- Kiyonger** : Aree, na metenia auditjibo agitetsü maha na?
- Alokba** : Niji atentsülasa aja aji.
- Kiyonger** : Oko, nai ka nung ana inoknung kwi? ajiangsüngla memetet nung koda?
- Alokba** : Ajito, parnok onghosa ongho inyakdangji ni süngo melua, horojioktsütsü nung kodajito.
- Kiyonger** : Oh Alokba!

Lilir : WhatsApp

**TANÜBO NAI LANGZÜANG**

Q. Koba tesem nung Reserve Bank of India (RBI) indang Headquarters mezüng lapoka liasü?

- A.Mumbai B.Bangalore C.Chennai D.Kolkata

\_\_\_\_\_ (Taruba adok nung onoki langzüsü)

**YASHI ADOK TELANGZÜBA :** Faded Blue Color

**AO OSHI ANGAZÜKDAK:**

**TANÜ ANGAZÜKTSÜBA OJANG**



Tir Yimym

**Chiyim**

(v) Chiyongtsü bushia senzüba (grazing)

\* Nashi telok ka moapu nung **chiyim**.

**Chuba**

(n) Linük nung nübor madak nisung kati dang yimsüsüba yimsüsür (king)

\* David **chuba** asüba mapang Israel nunger longjema liasü.

**NAI-A YA METETTER MA?**



Brehostibarnü (29.04.2021) Arouca, Portugal nung '516 Arouca' ta nüngra agütsüba suspension bridge ka lapokogo. Gari nung oli aruli asütsü melen tetsüng agi senzüsenbonger (Pedestrian) tem atema lapokba suspension bridge ya alima nung talangtiba asütsü. UNESCO-i jangjatteba Arouca Geopark kübok ayimba ayong - 'River Paiva' nungi meter 175 shi ajungketer iba apu yanglua lir. 516 Arouca apu ya küm ana shi agia euro million 2.3 million euro (2.8 million dollar) indoka renemogo.

**SUDOKU # 5843**

	8													
			1	7	5		3	4	6	1	2	9	5	7
			4	6	8		9		9	8	4	6	3	1
5			3				7	8	1	7	5	3	4	2
8	7		5	3	1	2			1	2	6	7	9	3
		4					5		8	9	7	5	6	4
		5			6	4	7	9	3	4	5	8	1	2
	6			5	1				2	7	8	3	4	5
	9	7	6			3	1	5	5	6	1	2	7	9
					9	2		8	4	3	9	1	8	6

**TELANGZUBA # 5842**


**OJANG LUTEP # 5386**

- KTLOI :
- TKLEEJANI :
- IRAN :
- TSAOÜ :
- OSHASI :
- NILENR :
- AKD :
- ASNTONALEG :
- JUNTAG :
- GDANÜNK :

**OJANG LUTEP TELANGZÜBA # 5385**

ASEN MEKÜMDANGI INYAKBA AJANGA TANGARA LENDONGI IDAKTSÜR AMA JUNGA SHISADANGTSÜLA

**TAN HOPTA ATEMA - KOMA SÜLA ?**

Q. Asen lima nunga Covid-19 tashidak wara agi amokmeren tialong nung assembly election agi nunga koma süla ?

# West Bengal nung CM, Mamata-i aniba TMC-i takok angu Mamata-i Nandigram menden nung tamakok angu



May 02, 2021 nü West Bengal state assembly elections osang sangdongba anogo nung TMC-i takok anguba sülen Birbhum nung TMC pusemertem benjungtepba noksa nung angur.

## New Delhi/Kolkata, Monupii/May 02

(Agencies): Amongnü West Bengal assembly elections votes zünga osang sangdongogo; West Bengal Chief Minister, Mamata Banerjee-i aniba TMC-i takok tulu nguogo, ajisüaka lai Nandigram menden nung BJP candidate, Suvendu Adhikary matsüngdang tamakok angu.

Tamasabo Mamata Banerjee-i Nandigram menden nung vote tali 1,200 agi takok nguogo, ta sangdonga liasü, saka BJP candidate, Suvendu Adhikary-i vote tanaben züngshitsü mepishiba sülen pai vote tali 2,000 agi takok angu, ta sangdong.

Osangbenertem den jembidang Mamata-i lai tamakok angubaji agizüker ta ashi, ajisüaka lar party-ibo twitter ajanga vote azünga ano metembang, ta metetdaksü.

Mamata-i, "Nandigram indang osangji ni agizüker. Ni Nandigram nung alirtem den salem lemsateper. Nüngdakra iba osang tanaben reprangshitsü atema ni court nung ken o benoktsü. Ajisüaka party atema iba ya tongtibang onük ka masü, kechiyong party-i menden 221 nung takok ngudar," ta metetdaksü.

Mamata Banerjee-isa,

party-i takok anguba ya nüburtem ajanga lir, aser iba ya democracy takok anguba lir, ta ashi.

Coronavirus wara anema raratsü ya tongtibangtiba, anungji election nung takok anguba atema tesülen ang benjungteptsü, ta lai metetdaksü. Party pusemertem dang takok anguba atema mebenjungteptsüla, ajisüaka coronavirus agi kongshia alirtem ang yaritsüla, ta lai mepishia metetdaksü.

"Menden 221 nung takok angutsü nükjidong yur ni inyaka liasü. Ni century ana (200) nguogo. Narendra Modi-i Bengal nung 'double engine sorkar' (Centre aser state naprongla nung sorkar) alitsü atema mepishia liasü, iba ya BJP atema tamakok tulu. Parnoki nisungtem dang tejak mesayutsüla," ta lai ashi.

"Covid tensa ya tama süngjemdakjang, iba sülenji ang takok anguba atema Brigade Parade Ground nung benjungteptsü," ta lai ashi.

"Bengal nüburtemi takok nguogo. Iba ya Bengal atema takok aser tesünap atema takok ka lir aser Bengal-i India kümzükogo. Takok tulu anguba atema linük nüburtem nem ni tenüngsang agütsür," ta lai ashi.

TMC tongti lenirisa, tang

coronavirus wara aliba nung ajemdaker sorkar tenangzükba agiba sentongji tongmelang agi dang agütsü, ta metetdaksü.

"Covid anema asenoki raratsüla. Ozü ketdangsertemi tetuyuba karbo agütsüogo aser tanü nungi ni mapa tenzüksü. Linük senso ajak nem vaccine angati agütsütsü atema ni akhanger. Iba atemaji Centre senpong nungi sen kangabo meindoktsü. Sorkari vaccine angati magütsüra ni Gandhi kürakyanglu jakdang mener longkak aittsü," ta lai metetdaksü.

Election Commission den agency balala aija lai, "Onok nem vote agüja takok ngudaktsüba atema ni nüburtem dang pelar. Sen aika den tashiyim kanga amshio. Onoki Election Commission anema-a raratsüsa aküm, kechiyong parnoki BJP kongsang ka ama inyak. India nung democracy ajungkettsütsü atema onoki Supreme Court constitutional bench nung ken o benoktsü. EC nung ochishia inyakertem alitsüla, mesüra democracy raksatsü," ta ashi.

"Ni nisung ajak nem tenüngsang agütsür. Ni Bengal nüburtem dang pelar. BJP-i tesempatsü politics asayayonga parnoki election nung tamakok nguogo," ta laisa shisem.



May 02, 2021 nü Ahmedabad (Gujarat) nung aliba Vaccination centre ka nung coronavirus vaccine atemba sülen nisungtemi ketdangsertem den raraba noksa nung angur.

# Taruba anogo 4-5 tsüngda India anüdoklen yipru sütsü: IMD

New Delhi, May 02 (Agencies): Tang Madhya Pradesh northwest tsütsülen yipru ka tenteta lir aser taruba anogo 4-5 tsüngda iba yipru jagi India anüdoklen kongshitsü, ta Amongnü India Meteorological Department (IMD)-i metetdaksü.

IMD-i twitter ajanga, "Madhya Pradesh northwest tsütsü yipru ka tentetdar aser ibaji Manipur tashi nung lower levels nung lir. Tang iba yipruji longitude 90°E aser latitude 25°N nung lir. Taruba anogo 4-5 tsüngda iba yipru jagi anüdoklen India kongshitsüa akok," ta metetdaksü.

IMD-isa, "May 2-5 tsüngda Sub Himalayan West Bengal den Sikkim aser Assam den Meghalaya tesem balala nung tzünglu sashia arutsüa akok; May 3-5 tsüngda Ganga ayong tiplen aser May 4 nü Odisha aser Arunachal Pradesh states nung tzünglu sashia arutsüa akok," ta metetdaksü.

May 4-6 anogotem nung Kerala aser Mahe nung, May 4-6 nung interior Karnataka aser May 5 nü Karnataka tzüyinkümlen tesem kar nung tzünglu sashia arutsü, ta India Meteorological Department-isa metetdaksü.



May 02, 2021: Amongnü Delhi nung aliba Ghazipur cremation ground nung coronavirus tashidak agi asürtem rongdokba noksa nung angur. Tesüiba ghonda 24 tsüngda Delhi nung coronavirus tashidak agi shiranger 412 süogo.

# India nung ano nisung 3,689 coronavirus tashidak agi süogo

New Delhi, Monupii/May 02 (Agencies): India nung ano nisung with 3,92,488 dak coronavirus tashidak putetogo aser tang tashi nung linük nung nisung ajak agi 1,95,57,457 dak iba tashidak putetogo, ta Amongnü Union health ministry data ajanga metetdaksü.

Tesüiba ghonda 24 tsüngda linük nung ano nisung 3,689 coronavirus tashidak agi süogo aser tang tashi nung iba tashidak agi asür ajak agibo 2,15,542 jungogo, ta Amongnü anepdang 8:00 ako nung Health Ministry-isa metetdaksü.

Tang India nung iba tashidak agi teshirangdakpur 33,49,644 lir, aser ibaji coronavirus caseload nungi shilem 17.3 lir; iba tashidak agi shiranger anepba shilem 81.77 dang kümogo.

Linük nung iba tashidak agi shiranger ajak agi 1,59,92,271 anepogo aser iba tashidak agi shiranger asüba shilembo tajemba küma 1.10% dang kümogo.

ICMR-i ashiba agi, May 1, 2021 tashi nung linük nung samples ajak agi 29,01,42,339 tendangogo aser iba nungji Honibarnü samples 18,04,954 tendangba densema lir.

Tesüiba ghonda 24 tsüngda iba tashidak agi asürtem (3,689) nungji Maharashtra nung nisung 802 asüba, Delhi nung 412, Uttar Pradesh nung 304,

Karnataka nung 271, Chhattisgarh nung 229, Gujarat nung 172, Jharkhand nung 169, Rajasthan nung 160, Tamil Nadu nung 147, Punjab nung 138, Haryana nung 125, Uttarakhand nung 107, West Bengal nung 103 aser Madhya Pradesh nung nisung 102 asüba densema lir.

Tang tashi nung linük nung iba tashidak agi nisung 2,15,542 süogo. Linük nung iba tashidak agi nisung timba asüba state ji Maharashtra (69,615) lir. Iba sülen Delhi (16,559), Karnataka (15,794), Tamil Nadu (14,193), Uttar Pradesh (12,874), West Bengal (11,447), Punjab (9,160) aser Chhattisgarh (8,810) state tem lir.

May 1, 2021 nü linük nung coronavirus vaccination shilem tasembuba tenzükba liasü, ajisüaka vaccine peria maliba agi state aika nung vaccination tasembuba shilem metenzüktem.

Honibarnü linük nung arrshi küm 18-44 tsüngdapur 84,599 nem mezüngbuba dose agütsüogo, ta Health Ministry-i metetdaksü.

Honibar aonung 8:00 ako tashi nung nisung ajak agi (arrshi küm 44 ser tempur densema) 16,48,192 nem vaccine dose agütsüogo.

May 2 tashi nung linük nung nisung crore 15.66 nem vaccine agütsüogo.



Lomas de Zamora, Argentina nung aliba Dr. Norberto Raul Piacentini hospital nung COVID-19 agi shirangertem anisungzüka aliba noksa nung angur. Argentina nunga COVID-19 tashidak otsü tasen yanglua puteter aser mozüki agi shiranger mesemi akumba mapang lir.

## Tir Biden-i tim masüba o jembir: North Korea

**Seoul, Monupii/May 02 (Agencies):** Tawa Tir Joe Biden-i o jembiba mapang North Korea ya security tsütsü tebilemtsü ka ta ashiba aser linük tsütsü mejungtepi alitsü tebilemba sayuba ajanga United States-i tensa tamajung ajurutsü, ta North Korea-i Deobarnü tekumdangtsü ashi.

US tir kumer Congress nung mezüngbuba taoba jembidang, North Korea aser Iran indang nuclear sentongtem ya America security aser alima security atema timtem lir, ta Biden-i ashi aser item tebilemtsü koktettsü asoshi külem tembar linüktem den lungjemer mera balala agitsü, ta shia liasü.

US-i küm 50 dak tema inyaka aruba ama pai DPRK tsütsü mejungtepi alitsü sentongtem maneni inyaksü tebilemba pa o nung angateter, ta North Korea indang Foreign Ministry nung ketdangsur Kwon

Jong Gun-i sangdong ka nung ashi.

Tanü tendak nung US tekolakbai aibelen tulu inyakogo. US-i DPRK atema sentong tasen benokba tejangja kumogo, aser onoki tapet telangzüba agütsütsüsa akumtsü aser mapang süitema aoba mapang US tensa tamajungi aitsü, ta Kwon-i ashi.

North Korea-i kechi mera agitsüar ajibo Kwon-i tejangja mashi, aser pai jembiba ya Biden administration ajanga North Korea atema sentong yangluba nung tebilemdangtsü ka agütsür amai ajiteter.

North Korea nuclear sentong anendaktsütsü merangba maparen nung pa jakdang US tir inyaker anati amshiba yimyatem Biden-i mamshitsü tebilemba lir aser administration ketdangsurtemi North Korea tsütsü US sentongtem asadanga

maparen temogo, ta White House ajanga Hokulbarnü sangdonga liasü.

Press Secretary Jen Psaki-i sentongtem asadanga nung ngutetba indang tejangja mashi saka Donald Trump-i inyakba ama masü aser Barack Obama-i inyakba ama masü tiyong ka nung inyaksü, ta ashi.

2016-17 nung nuclear aser missile aika tendangba sülen North Korea lenir Kim Jong Un-i Trump den yimjung atema senden amen tenzük. Saka North Korea nem tenokdanga agüja aliba agienba melena komaser denuclearization meratem agitsü, ta asüba onük nung taginüba balala asüba mechi küm ana shi iba ken o mejembir.

Kim-i nuclear sentong tuluba kumshia US linük nung tenük yoker nok-o-nü tesashiba yanglutsü, ta January ita amokmeren liasü.

## Afghanistan nung totzü abenba gari nung mi adok, nisung 7 asü

**Kabul, Monupii/May 02 (Agencies):** Afghanistan yimtiba, Kabul north tsütsü totzü abenba garitem nung mi adokba lendong nung nisung tenet asü aser 14 yiru.

Deobarnü bushisüngdangertem tanker ter dak tema aser petrol station ka mokozü adoka rongga aliba mita ao, kong Honibarnü menur mi jangruloka liasü, ta interior ministry indang odongtar Tariq Arian-i ashi.

Iba mi lendong ya tia nisung mekundanga nungi asü mesüra asaa inyakbar ano mejangjai lir. Afghanistan nungi United States aser NATO sepaitem anünga alirtem anizüker ao tenzükba anogo iba lendong ya ataloker.

US sepai 2,500 nungi 3,500 shi aliba ajunga aser NATO telungjem sepai 7,000 shi aliba ya temonutiba agi September 11 tashinung Afghanistan nungi ainshir alitsü, koba US nung lendong tulu agütsür küm 20 ajunger asütsü. US nung iba lendong atalokba sülen Afghanistan-i sepaitem ya arua liasü.

Totzü abenba gari ka nungi mi ya tenzük, ta Arian-i ashi. Iba sülen anasa aliba tanker (totzü abenba garitem) nung mi kaolokyonga oa amfang nung anüngleni milong aser mokozü atu aser ano anasa aliba ki kar aser gas station ka nunga jangruloka liasü. Iba mi yagi ki-o-jen kar rongdok aser Kabul tesem tuluba nung electricity makai akum.

Iba lendong nung yirurtem ya timba mi agi arongba liasü aser parnok ya yangji aliba mozüki nung anepalua liasü. Deobarnü truck anirtemi iba tesemi aoba lenmangtem nokdanga sorkar nungi teyari meshia takhangba agüja liasü.

Item gari ya yimti-i aitsü atongtepa anentena liasü, ta gari anir Haji Mir-i ashi.

"Mezüng apokba ola ya mine apoker mesüka liasü. Truck ka nungi milong pokteta adok aser iba sülen truck tanabuba aser tasembuba apok," ta pai ashi. Iba lendong nung truck 100 shi rongdoka alitsü südi, ta pai ashi.

Iba tesem nung alir Obaidullah-i ashiba agi, milong ya tululu adoka liasü. Par kibong aser kidangertem kima leni jena ao.

"Mi agi anüng sangwadaktsü. Driver tem ayimtena liasü aser parnok yariteper tem temai madokteti mi agi rongga liasü," ta pai ashi.

Lendong atalokdaki mibener tem aru saka parnok tashi ajema liasü, anungji mi azüoktsü atema ghonda aika agia liasü. Deobarnep tashi gari aser petrol pump rongroker alidak nung jangrua liasü.

February ita tiyonglen Afghanistan aser Iran arrtsü nung totzü abenba truck ka apokba sülen sen dollar million aika jenjang totzü abenba gari noklang aika rongdoka liasü. Iba lendong nung nisung 17 yirua liasü.

## Deobarnü Myanmar nung longkak aiter pongu tepset

**Yangon, Monupii/May 2 (Agencies):** Military-i sorkar atsüngtokba ajanga ita asem tashi mepetmesü tulu adoka aruba sülen maneni Deobarnü Myanmar nung security forces temi longkak aitertem dak injang khaloktsüba sülen nisung pongu tepsetogo, ta media sangdong balala ajanga metetdaksü.

Mapang tatsüka telok tilala dang adenshia longkak aita aruba den security forces temi azüzüka aruba sülen iba longkak aitba sentong ayongzükogo, koba sentong ayongertem "the global Myanmar spring revolution" ta nüngja agütsüogo.

"Myanmar nungertem telongjem ola ajanga alima anokshijang," ta sentong ayongertemi ashi.

Yangon aser Mandalay yimti densema jila aser yimti balala nung longkak aitba sentong ayongzüka agiogo aser item sentongtem ya karbo Buddhist monks temi anir agia liasü.

Deobarnü longkak aitba mapang Wetlet jila nung nisung ana tepsetogo, ta Myanmar Now news sangdong ka ajanga metetdaksü. Kasa mapang nung Shan State kübok jila balala ana nung nisung ana

tepesetogo, ta media outlets anati metetdaksü.

Ano Hpakant jila nunga nisung ka tepsetogo, ta Kachin News Group sangdong ka ajanga metetdaksü.

Irrawaddy news site-i, Mandalay nung sepai süoshi mesemi aliba security officer kati prangbong ka amer akhatsü renemba noksa ka sayuogo. Ajisüaka iba yimti nung nisung asüba osangbo kecha mali.

February 1 nü sorkar atsüngtokba ajanga longkak aitba tebilemtsü dang bener arutsü masü saka ita asem tsüngda linük nung telungpurtem den mangatettep tali kümogo aser iba ajanga nüburttem meyirejang aika pei talidak toktsür jenshiaogo, ta U.N. sangdong ka ajanga metetdaksü.

Tesem kar nungbo civilian temi hadir balala bener security forces tem den raraogo aser linük teyongtsülen putu aika teküzmükba kübok aliba military aser sorkar facility tem aika rocket agi amakba den rasaa ashitsü makokba bomb lendong aika ataloka arudar.

State meyong broadcaster-i Honibarnü nikonngtsütsü news bulletin nung, taoba ghonda 36

tsüngda tesem balala nung bomb 11 pokdaktsüba osang tejangja agütsüogo, koba timba ka Yangon yimti nung ataloka liasü. Lendong nung kiojenbo raksaogo saka nisung asüba osang kecha magütsü.

Ajisüaka telok kati danga bomb pokdaktsüba nangzüka mali. "State süngjema metoktsünüba nisung kari sorkar ki tem aser lenmang nung teka agi yangluba bomb tem mereplokja pokdaktsür," ta state broadcaster-i ashi.

Khit Thit media-i, Deobarnü züngia Yangon nung police barracks ka kima bomb pokdaktsüba metetdaksüogo. Kasa osang ajangsa garitem arongba osang agütsüogo, saka nisung asüba osangbo kecha magütsü.

Iba sülen mapang tatsüka lir yimti nunga bomb apokba indang osang sangdonga liasü. Shan State nung news portal kati, nungtugu shishilembar ka indang kima bomb pokdaktsüba sangdongogo.

Kasa mapang nung Assistance Association for Political Prisoners advocacy group-i ashiba agi, military-i sorkar atsüngtokba sülen security forces temi longkak

aiter 759 tepsetogo.

Military-ia April tom nung longkak aiter nisung 248 tepsetba nangzükogo. Longkak aitba mapang security forces tema aika süogo, ta military-i ashi.

Longkak aitba den repsema civil disobedience campaign ka tenzük aliba ajanga linük rongsenketsüng lemta kümogo aser sensakertem yatzüra agi

meneptsü ana nung lir, ta aid agencies temi tekümdangtsü metetdaksüogo.

U.N. Development Programme-i taoba hopta, yimden yimsüsüba tsütsü mangatettep adoker aliba aser wara pokteter aliba ajanga 2022 küm tashi nungbo nisung million 25 shi sensaktai-i aitsü ta tekümdangtsü metetdaksüogo.



Panama City, Florida anasa Gulf of Mexico nung NASA astronaut Shannon Walker, NASA astronauts Mike Hopkins, Shannon Walker, aser Japan Aerospace Exploration Agency (JAXA) astronaut Soichi Noguchi nungner mena aliba SpaceX Crew Dragon Resilience spacecraft alua anener iba anünglak tayimtsü nungi NASA astronaut Shannon Walker anittdang tangokba noksa ka yangi angur. NASA indang Commercial Crew Program nung shilem ka ama International Space Station-i SpaceX Crew Dragon spacecraft nung astronauts (nüngjang-petinu takzürtem) anir oa liasü.



## Mahesh Babu aser Trivikram Srinivas na longjemtsü



**Mumbai, Monupii/May 02, 2021 (Agencies):** Telugu superstar Mahesh Babu-i pa indang taruba project atema director Trivikram Srinivas den longjemtsü. Küm 11 sülen, project tasen ka nung actor aser director na külemi inyaktsü terenemba lir.

Mahesh aser Srinivas naprongla Athadu (2005) aser Khaleja (2010) film nung külemi inyakba ajaki jangjaa lir.

## Samsung Galaxy 'Book Pro' aser 'Book Pro 360' saya

**New Delhi, Monupii/May 02, 2021 (Agencies):** Samsung-i 'Galaxy Book Pro' aser 'Galaxy Book Pro 360' sayaogo. Device ana ya ultrabooks aser convertible laptop alitsü.

Specification tsütsü reprangdangra, Galaxy Book Pro 13 aser Pro 15 feature 13.3 inch AMOLED aser 15.6-inch AMOLED panel angutsü, kong 16:9 full HD resolution dena lir. Variant anaprongla display panel ji non-touch alitsü, koba large-display aser compact space user atema tetemjen asütsü.

Galaxy Book Pro nung RAM variant ji 8GB, 16GB aser 32GB LPDDR4X tsüngda angutsü. Ano külen, storage atema 1TB NVMe SSD inoktsüogo. Laptop anaprongla nung 11th generation Intel Core i3, i5 aser i7 processor option angutsü. 13-inch variant nung Iris Xe integrated graphics aser 15-inch Galaxy Book Pro nunga SKU den Nvidia GeForce MX450 GPU dena lir.

Laptop ana rongnung,

## Nick Jonas-i '2021 Billboard Awards' sentong ketdang asütsü

**Los Angeles, Monupii/May 02, 2021 (Agencies):** Nüngtugu kentener aser actor Nick Jonas-i aruya aliba "2021 Billboard Awards" show sentong ketdang (host) asütsü terenemba lir.

May 23 nü Los Angeles yimti nung ayonga agitsü aliba award sentong nung MC ama arishi küm 28 tain Nick anikogogo.

Twitter sabang ajanga Billboard-i iba osang lemsatepa liasü.

"2021 @BBMAs ketdang asütsü atema... @nickjonas anikogogo! Deobar (23.05.2021)

Nüngja agüja maliba film ya superstar Mahesh indang film 28buba alitsü. Iba film ya Haarika aser Hassine Creations sabang kübok S. Radha Krishna (Chinababu)-i produce asütsü aser film ya 2022 küm tsüklawa mongpu mapang sayatsü sentong lir.

"Fans temi kanga dang yongya ata arur sülen küm 11 lir Mahesh aser Srinivas na longjemer," ta Twitter ajanga

Samsung Galaxy Book Pro 13 ya LTE variant nunga angutsü. Pro 15 nung Wi-Fi 6/6E, Bluetooth 5.1, Thunderbolt 4, USB-C, USB-A 3.2, HDMI (only in 15-in variant), 3.5mm audio port aser microSD memory card slot inoksema yanglutsüogo.

Device anaprongla nung Samsung indang generation Pro keyboard tasen den scissor switches aser 1mm key travel den trackpads shilem 23 agi tuluba angutsü. Iba den külemi, laptop anaprongla nung Samsung indang AKG tuned speakers den Dolby Atmos certification dena lir.

\* Samsung Galaxy Book Pro 360

Iba convertible variant nung Super AMOLED display inokja lir. Iba laptop tasazük 13-inch alitsü, saka 5G connectivity angutsü, koba iba laptop line-up rongnung 5G feature aketba variant asütsü.

Galaxy Book Pro 360 indang SKUs ajak 11th generation Intel processors den Iris Xe graphics - Core i5 aser Core i7 SKUs,

nikongdang 8pm ET/5pm PT ako meta NBC nung iba sentong agitsü terenemba lir," ta Billboard-i lemsatep.

"Billboard Music Awards indang host ka ama Jonas-i mezüing iba sentong ketdangsüa agitsü, koba tesüiba küm 30 nungi agia aruba music award sentong ya pa dang nungi küm ana agi timba alitsü. Ajisüaka, taküm Oscar nominations sangoktsütsü asoshi pa kinungtsü Priyanka Chopra den külemi shilem agiba densema pai award sentong aika nung shilem agia aruogo," ta

film yanglurtemi lemsatep.

"Küm 11 tashi ataa arur sülen, #SSMB28 atema Super Star @urstrulymahesh garu aser #Trivikram garu naprongla tanaben longjemtsü.

@haarikahassine banner kübok S. Radha Krishna (Chinababu)-i iba film yanglutsü. 2022 küm tsüklawa mongpu mapang iba film theatre nung sayatsü imlar," ta kasa sangdong nung shia lir

Tanga sangdong ka ajanga angazükba agi, iba film nung actress Pooja Hegde-i Mahesh Babu den külemi shilem agitsü. Ajisüaka, film maparen dak sendakba nung film yanglurtemi osang tejangja ka magütsü.

Maneni, Mahesh Babu-i 'Sarkaru Vaari Paata' film nung shilem agia lir. Sarkaru Vaari Paata film ya Parasuram-i zülua aser direct süogo. Parasuram-i Geetha Govindam direct asüba ajaki jangjaa lir.

asere Core i3 SKUs nung UHD ajanga tashi agütsü. RAM atema Galaxy Book Pro 360 - 13 nung 16GB LPDDR4X aser 15-in variant nung 32GB tashi angutsü.

Storage atema 1TB NVMe SSDs, den Galaxy Book Pro line-up nung tanga product ama speaker, keyboard aser trackpads kasa inoka yanglutsüogo. 13-in aser 15-in variant tsüngda port tem kasa alitsü.

Tanga feature tsütsü reprangdangra, Galaxy Book Pro series - 13-in laptop nung 63Whr battery aser 15-in variant nung 68Whr battery angutsü. Item laptop nungsa fingerprint authentication den power keys aser series indang variant pezüprongla Mystic Navy aser Mystic Silver sentsü nung angutsü.

Iba convertible variant ya Mystic Bronze sentsü nung angutsü, koba Samsung-i Galaxy Note20 series nung mezüing adokja liasü. Ano külen, standard Galaxy Book Pro ya Mystic Pink Gold nung angutsü.

Billboard-i ashi.

Nick, shibai presenter ama Kelly Clarkson melenzüktsü, pai "2021 #BBMAs award sentong ketdang asütsü maongka anguba ya atangji nunga konang ka ama lir. Iba sentong nung shilem agitsü asoshi yongyar! May 23, 2020 nikongdang 8pm ET/5pm PT ako meta @NBC nung nenok den ajuruteptsü yongyaseter," ta lemsatep.

Iba award dak sendakba nung The Weeknd ajanga Billboard Music Awards nomination 16 tashi ngua lir.



Office of the  
**MONGSENYIMTI SENSO MUNGDANG**

B.P.O MONGSENYIMTI P.O CHUCHUYIMLANG  
DIST: MOKOKCHUNG NAGALAND-798614

### **KHONANG TETOSHI YIMYIM**

Mongsenyimti senso rongnungi Wb. Imtiolem aser Wt. Walusangla na jabaso mongin tsüngteper Sp. Arsenba Ozüküm ajanga National Mixed Martial Arts Championship 2021 Bengaluru nung akadang Hon Dogma (Gold Medal) jenjang ajangzükteta Mongsenyimti Senso sanger ajak nem konang tulu bentsür aruba tepela tetushi Mongsenyimti Senso Mungdang ajanga lemsateper.

Tsüngremi maneni pa sempet aser pa nokdakba wadang nung temoatsü, azükaru aser temaba takok lidakjang ta Senso sanger tamang aser sarasadem.

**Sd/-**  
**(WB. IMOTONG)**  
**President**  
**MSM**

**Sd/-**  
**(WB. OBANGONEN)**  
**Secretary**  
**MSM**

### **KONANG TETUSHI AGÜTSÜR**

Tawa NPSC tatidang nung Süngratsü senso anati lenmang balala nung takok tajung nguteta yimer yimsanger nem tenüing tajung bener arutsüba asoshi tena nem konang tetushi agütsür.

(i) Mr. Kilangtamsü, EAC 2nd Position (S/o Lt. Nunghitoshi Walling & Mrs. Katenwala Aier).

(ii) Mr. Imkumnixung Aier, Station Superintendent/ Enforcement Officer (S/o Mr. & Mrs. Imsütemjen Aier).

Nenati konang nüngsang bener arutsüba nung senso nübur rangben pelateper aser nema atanger. Aji oda, tarutsü nunga teyanglur Tsüngremi nena taküm moatsütsü onok tamang teimla.

**Sd/-**  
**Watizülü Aier**  
**President**  
**Süngratsü Senso Senden**  
**Mokokchung**

**Sd/-**  
**Aoluin**  
**President**  
**Süngratsü Students'**  
**Union Mokokchung**

### **SHISA AJEMER SOCIETY**

#### **Raffle Draw Result**

- |              |                |
|--------------|----------------|
| 1. 1st Prize | : Sl. No. 778  |
| 2. 2nd Prize | : Sl. No. 1027 |
| 3. 3rd Prize | : Sl. No. 583  |

Consolation : 1. 327, 2. 202, 3. 847, 4. 195, 5. 102

## Ashlesha Savant dak Covid-19 putet



asere oximeter yur tangokba black & white noksa ka lemsatep. "Imlibilema nenoka pei sasa anepalua liang aser shisatsü süngjemshir iba timtem koktetsüsa teimla yuang," ta laisa lemsatepa liasü.

"Kumkum Bhagya" nung Ashlesha Savant-i Meera ama shilem agiba ajaki jangjaa lir. Iba serial dak alaka, show balala talisa "Pyaar Ka Sard Hai Meetha Meetha Pyaara Pyaara" aser "Saat Phere" nung lai shilem agiba nguogo.

India nung Covid-19 wara tanaben adokba mapang, Savant dak alaka, tawa television actor kar dak iba tashidak putetba osang balala ajanga angazükogogo.

Patiala Babes nung actor Aniruddh Dave, shiba Bhopal nung liasü, taoba hopta pa-a Covid-19 positive putet aser Honibarnü Intensive Care Unit nung anepaludar. Bigg Boss 14 takok angur Rubina Dilaik, dancer-actor Shantanu Maheshwari, Anupamaa nung shilem agir Alpna Buch aser Nidhi Shah den kentener Aditya Narayan aser pa kinungtsü Shweta Agarwal naprongla dak iba tashidak putet.

**Mumbai, Monupii/May 02, 2021 (Agencies):** "Kumkum Bhagya" nung shilem agila, actress Ashlesha Savant dak Covid-19 tashidak putet. Honibarnü, social media sabang ajanga Savant-i la dak iba tashidak putetba osang lemsatepa liasü.

"Tanü ni Covid-19 positive putetogo. Doctor tetuyuba nung anidaka kidang quarantine südar. Ajaki pei sasa anepalua aser kümdangshia liang. Nenok sarasadem nüngdaker aser iba ama tia ajurur aliba mapang, shirnoki aria bilemja nungita yaridar, nenok ajak dang pelaba metetdaksür," ta Instagram sabang ajanga lai lemsatep.

Iba olen den külemi lai la tekapu ma nung thermometer

## Viktor Axelsen dak Covid tashidak potetogo



**Monupii/May 2, 2021**

**(Agencies):** Badminton world number two Viktor Axelsen dak Covid-19 tashidak potetba sülen pa Deobarnü Kiev nung tang asayaa aliba European Championship nungi tuguatoksüsa aküm.

Final asaya nung Axelsen aser külem Denmark nunger asayar Dane Anders Antonsen na asayatsü liasü, shibai tang mezüngbuba walkover ka

ajanga European title ka kokogo.

"Top seed aser defending champion Viktor Axelsen dak tanabuba test nunga Covid-19 tashidak potetogo aser iba ajanga pa 2021 European Championships tebur kija asaya final nung masayatetsüsa kümogo," ta Badminton Denmark-i Deobarnü metetdaksü.

Honibarnü semifinal nung

Finn Kalle Koljonen akokba sülen arishi küm 27 tain Axelsen dak covid tashidak keta aliba potet, aser pa Kiev nung dang lokti nungi pilar temang anepalutsü.

"Pa anogo 13 tashi pa indang hotel takdang nungdang quarantine asütsü," ta kasa sangdong ajanga metetdaksü.

Rio Olympics nung bronze medal ngur alisang Axelsen-i, pa temang junga dang lir ta shiogo.

"Tanü Andres den final asayatsüba dak alaker ni tanga kecha minyakner ta tejangja," ta Axelsen-i ashi.

"Ano ni hopta ana sülenang kidangi oa ozü kinungertem den ajuruteptsü," ta paisa ashi.

"Tensa majungba mapang isolation aser quarantine asütsü ana nung lir ta meteta onoki asayatsüsa akümer. Kü dak tashidak keta aliba temaitsü kecha mesayur aser ni temang anema dang lir," ta pai ashi.

## Delhi Capitals head of talent search asütsü Saba Karim shim

**Monupii/May 2, 2021**

**(Agencies):** Taoba mapang India team wicketkeeper aser national selector Saba Karim, Deobarnü Indian Premier League club Delhi Capitals-i head of talent search asütsü shimogo.

Karim ya January ita tashi BCCI indang General Manager (Cricket Operations) liasü.

Arishi küm 53 tain Karim-i 90s tom nungi 2000 tetenzüklen tashi nung India tenü nungi ODI 34 aser test ka nung asayaogo, ajisüaka pa tenük yiruba ajanga masayatetsüsa

aküm.

Talent scout ka ama Delhi den adenba indang jembidang Karim-i, "Delhi Capitals atema Talent Scout ama shilem agütsü yongyaa atar," ta ashi.

"Kümtem tsüngda IPL ajanga sempet aketba asayartem aika temai adokdaksüogo aser maneni alima nung asayar tajungtibatem adokdaksüdar. Delhi Capitals ya jangrademtsü team ka aser parnok maneni renloka aotsü atema teyari agütsütsü yongyaa atar," ta paisa ashi.

Paisa, Covid-19 wara

pokteter aliba mapang pei kinungertem nungi pilar asayaa aliba asayartem nem tenüngsang agütsü.

"Mezüngbuba nung taküm IPL asayaba mapang asayartem tasü aitba sayuba atema parnok nem tenüngsang agütsür," ta Karim-i ashi.

"Tensa majungba mapang pei kinungertem nungi pilar alitsüji temela masü. Ajisüaka parnoki toktsür moi maneni asayamung nung shilem agidar aser iba atema parnok nem tenüngsang peria agütsütsü langa lir," ta paisa ashi.

## Pooran-i India nem COVID-19 atema tenla agütsütsü



**New Delhi, Monupii/May 2, 2021**

**(Agencies):** West Indies batsman Nicholas Pooran, shibai tasayadak aliba Indian Premier League (IPL) nung Punjab Kings telok atema shilem agidar, tang India nung Covid-19 wara anema raraba mapatong nung pusama pai pa indang IPL taa nungi shilem ka tenlatsü asoshi social media sabang ajanga osang sangoktsüogo.

"Alima ajunga asüngba COVID-19 wara ajanga linük balala nung tensa mejungi kümaka, tang India nung iba wara tensa ya taoba küm dang nungi kanga agi tamajungba lir. Tang ama teyari nüngdakba

mapang ka nung nia akok tashi tekümdangtsü prokba den rongsen agi yariteptsü mulunga lir," ta Twitter nung video ka ajanga Pooran-i lemsatop.

"Cricket fans aser teyariteper ajak dang, iba wara nungi ni kümzüka lir aser India nung Indian Premier League asayatsü maangka anguba ya jenjang tuluka ama pelaba lemsateper. Ajisüaka, asenok iba wara agi mekütbanger aliba ya kanga dang temulung züreper. India nung Covid-19 anema raraba mapatong tsütsü, IPL ita sen nungi shilem ka tenlaner," ta video nung Pooran-i ashi.

Pooran-i pa ita sen shilem ka


tenlatsü osang magütsüdag, kasa anogo, pa indang IPL franchise Punjab Kings-ia NGO telok ka - "Round Table India" den longjemer oxygen concentrator tem tenla agütsütsü nangzüko.

"India nung #COVID19 anema raraba mapatong pusama, #PBKS-i @roundtableindia den longjemer oxygen concentrator tem tenla agütsütsü nangzüko! Iba wara anema raraba mapatong nung ajaki amalitepa inyaktü aser pei akokba yari tenla agütsütsü asoshi onoki mepishir, kechiyong asenok ajak longjemer inyak nungang iba wara koktetsü," ta Twitter ajanga Punjab Kings-i lemsatop.

India nung Covid relief maparen nungittsü asoshi, Bresthostibarnü, Rajasthan Royals aser Delhi Capitals napronglai senotsü tenla agütsüogo.

Maneni, kasa mapatong nung pusama, Pat Cummins, Brett Lee aser Sachin Tendulkar nungeri rongsen teyari agütsüogo.

## Messi-i English football pu asemer



**Monupii/May 2, 2021**

**(Agencies):** Lionel Messi-i pa indang social media sabang amshia Honibarnü online nung nüburtem mezüngmeshiba anema jenjang tapet agütsü ayongzüko. Social media nung Messi sülen anidaker million 200 lir.

Online ajanga nisung ka shilu dak ajemdaker mesenmetui amshiba aser mezüngmeshiba anema England nung soccer league, club aser asayartem anogo pezü social media nung shilem magütsü atema telemtetba agir aliba mapang Barcelona indang forward yagi iba osang lemsatepogo.

Messi-i ajem ajema melei pa indang Instagram ajanga, social

media nung mezüngmeshi maparen anema British soccer-i apiteta inyakba atema parnok nem tenüngsang agüja liasü.

Messi-i pa sülen anidakerem dang, profile shia sülen nisung shiba ali pa/la akhümtsübuttsü ayongzü, ajita asünungdang account ajak ya shi aser azü keta aliba nisung kakatibo achaayanger shibai mener, ajeber, taküm jangradema alir aser timtem tekangshia ajangshir ta angatetsü.

Maneni pai Facebook, Twitter aser tanga social media company tem dang jenjang talila agütsü ayongzü.

"Nisung shinga mezüngmeshia mamshitsüla.

Social media nung nüburtem mezüngmeshiba asenoki angur aser ajangshir, saka iba ya nokdangtsü atema shingaia kecha minyakner. Asenok ajaki iba anema nokdaksüla aser item network anepaluba company tem dang iba amala yimiyayimpong anema jenjang tapet agütsü atema akhangtsüla,"

ta Messi-i Spain oshi nung zülutsü.

## Football Administrator tejen DK Bose süogo



**Monupii/May 2, 2021**

**(Agencies):** Football administrator tejen aser Hindustan FC kibur Dilip Kumar Bose COVID-19 tashidak den rarar local mozüki ka nung süogo. Bose ya Vasant Kunj kibok Indian Spinal Injury Centre nung Honibarnü nikonngtsütsü asü. Pa küm 70 dak tema liasü.

Bose'er kinungertem timbaka tang iba tashidak agi timtemdar. Pa April 29 nü mozüki-i anir aoba anogo tebua asü.

Bose-i Delhi Soccer Association indang Executive Committee nung küm aika inyakogo. Delhi nung international mesera national tetoktepba ayongzüka shia organising committees nung pa densema liasü.

Football Delhi-i, pa ya yimti nung football asaya nung nükdang tashi taitiba liasü ta

shia Bose asüba mang ayimer aser par kinungertem den asükhü lemsatepogo. "Asaya atema pa tejangraba aser kecha agi adoksatsü makok. Pai Delhi nung football ajungtetsü atema mapa tajung aika inyakogo aser pai bendanga agüja meranga inyakba ajanga Hindustan FC ya India nung jangjaa kümogo," ta Football Delhi-i ashi.

Football Delhi tir Shaji Prabhakaran-i, "Pa asüba ya kü atema-a takoksa tulu. Ni pa den metetteper küm 20 dak tali jungogo. Onoki DK Bose ya tetemtsü administrator ka ama teti bilemtetsü, shiba iba asaya atema ajak bendanga agütsüogo. Pai toktsüba ongdang ya süngdaksütsü atema Delhi football asoshi kanga tasak asütsü. Onoki pa kanga menungratsü," ta ashi.

## **BILEMDANGANG**

**"Tetsübu nung aliba agi nükjidong metongteter."**